

四庫全書

史部

欽定四庫全書

欽定外藩蒙古回部王公表傳卷之一百八

傳第九十二

扎薩克一等達爾漢額貝都拉列傳

今襲郡王品級多羅貝勒

額貝都拉哈密回部人初號達爾漢伯克隸準噶

爾康熙三十二年

遣理藩院員外郎馬迪等

頒賚策妄阿喇布坦道哈密有叛賊罕都羅卜藏額琳沁

者自準噶爾來降尋叛竄偕噶爾丹屬圖克齊霍  
什哈哈爾海達顏額爾克等以兵五百戕馬迪掠  
駝馬遁額貝都拉聞之給從迪者糧騎護歸嘉峪  
關

上以罪在噶爾丹

詔勿問哈密三十五年額貝都拉遣納林伯克貢駝馬表  
曰臣白帽族貢中國久

天使至臣所噶爾丹以兵戕臣不能護脫恐不睦臣者謂

臣與逆謀

上即天也違天者必受殃厄魯特數徙牧或肆掠已輒竄  
臣城郭居焉敢為逆噶爾丹既為大軍所敗

諭哈密勿數逆額貝都拉遣使納林伯克奏偵噶爾丹至  
當擒獻

上嘉其恭順

賜章服貂冠金帶而是時噶爾丹遣圖克齊霍什哈達什  
哩鄂摩克圖霍什哈等貸糧哈密復齎書通問桑

克拉什呼圖克圖曼殊呼圖克圖和碩齊台吉博  
貝等乞援族台吉衮占妻諾觀達拉遣達爾漢宰  
桑挈屬從噶爾丹復令其乳母子丹津扎卜俄羅  
岱達爾扎及子色布騰巴爾珠爾乳母之父揮特  
和碩齊從色布騰巴爾珠爾獵巴里坤額貝都拉  
遣長子郭帕伯克以兵三百擒之明年遣次子白  
奇伯克械獻表曰臣擒噶爾丹子及其屬厄魯特  
必讐臣哈密危且懼請

諭令勿虐臣

詔策妄阿喇布坦及青海厄魯特台吉等勿擾哈密

賜額貝都拉及郭帕伯克章服銀幣白奇伯克如之從者

給白金文綺有差時副都統阿南達設哨嘉峪關  
外額貝都拉告曰哈密地小而貧厄魯特竄至者  
衆力不獲養欲獻軍馬復多瘠請驅令出境阿南  
達語曰爾當體

聖天子好生仁善養之軍事嚴俟

詔行而策妄阿喇布坦數遣使哈密索噶爾丹子檄以所  
收厄魯特歸吐魯番且詰哈密內附故額貝都拉  
語曰我誠附

天朝非迫而然也策妄阿喇布坦憾之拘其使額貝都拉  
亟遣告曰策妄阿喇布坦將復索所收厄魯特不  
給將興戎

詔已賜檄勿懼索者至勿擅給未幾噶爾丹自殺其族子  
丹濟拉攜噶爾丹骸走哈密掠畜遁濟木薩額貝

都拉以告

遣使往招降丹濟拉懼策妄阿喇布坦阻馳奔哈密額貝  
都拉迎入城給糧騎遣郭帕伯克護至

詔以額貝都拉為一等扎薩克仍達爾漢號

賜敕印及銀幣以郭帕伯克為二等伯克協理旗務白奇  
伯克如郭帕伯克職四十八年卒子郭帕伯克襲  
一次襲郭帕伯克額貝都拉長子康熙四十八年  
襲扎薩克一等達爾漢五十年卒子額敏襲



二次襲額敏郭帕伯克長子康熙五十年襲扎薩克一等達爾漢五十四年準噶爾襲哈密敗之大軍屯巴里坤額敏復壅塔勒納沁田歲輸青稞助雍正五年

諭曰額敏自軍興以來輸忱効力率所部人等屯耕助軍甚屬可嘉著晉封鎮國公七年來朝晉封固山貝子

優賚遣歸十年準噶爾兵復襲哈密額敏簡健卒設伏城外禦之馳乞援大軍至賊遁乾隆元年額敏奏興師

來哈密歲納屯糧計二萬七千五百石已支用萬  
八千餘石今已里坤軍撤請屯耕如故

詔賜幣嗣免納糧五年卒子玉素卜降襲鎮國公

三次襲玉素卜額敏長子乾隆五年襲扎薩克鎮  
國公十年晉封固山貝子十一年議設汎錫喇諾  
爾及畢柳大坂玉素卜請供官馬芻茭簡卒助守  
允之二十一年吐魯番莽噶里克叛子白和卓入

覲旋抵哈密玉素卜偕副將祖雲龍議擒之達書吐魯

番扎薩克輔國公額敏和卓令決剿賊計

獎賜幣復

詔簡所部兵三百援吐魯番尋莽噶里克亂定二十三年春請以兵百從大軍征逆回布拉呢敦霍集占諭曰王素卜係回部望族今聞辦理葉爾羌喀什噶爾等回部情愿率兵効力深可嘉獎著照所請同雅爾哈善額敏和卓前往所有應得分例照蒙古貝子例賞給回兵照綠旗兵丁例賞給果能奮勉勦

賊朕將格外施恩

詔授領隊大臣會靖逆將軍雅爾哈善奏俟取庫車烏  
什阿克蘇等城以從軍之庫車伯克鄂對等駐其  
地

諭曰回人性情雖不同厄魯特而近年與厄魯特雜處  
不免漸染習氣未可深信取庫車等城後伯克鄂對  
等亦不當專令看守其聽玉素卜節制夏大軍圍庫  
車逆黨阿卜都克勒木自阿克蘇來援擊之敗遁

分賜

御用佩飾霍集占尋擒賊五千餘援庫車復為大軍所

敗

賜幣

詔叙績秋七月賽哩木沙雅爾回人乞降玉素卜撫其

衆攜徙軍營近地願留者以戶籍獻八月克庫車

雅爾哈善令玉素卜駐其地阿克蘇降定邊將軍

兆惠檄玉素卜駐阿克蘇尋烏什降復檄駐烏什

大軍抵葉爾羌賊抗諸喀喇烏蘇時駐烏什兵僅  
二百五十餘王素卜檄阿克蘇兵五百赴烏什防  
變復謀徵布魯特兵攻喀什噶爾分葉爾羌賊勢  
聞烏魯特特穆爾居烏什為布魯特屬召給糧馬  
茶幣令侍衛布占泰攜往烏魯特等欣就道

諭曰王素卜辦理軍營駐守烏什俱屬悉心奮勉甚屬  
可嘉著加恩賜給貝勒品級復以輸駝馬助阿克蘇  
援喀喇烏蘇兵

詔如值給二十四年布拉呢敦霍集占竄巴達克山

詔俟大功成簡玉素卜偕額敏和卓分守葉爾羌喀什噶爾資倚任復以報効志誠

諭晉封多羅貝勒巴達克山尋獻霍集占首

諭曰玉素卜雖不與將軍大臣等同在軍壘但駐劄烏什辦理諸事亦極奮勉著加恩賞給郡王品級尋

詔入

覲伯克等四十四人以玉素卜偕貝勒霍集斯頌之二

十五年春至京

召謁於

正大光明殿

賜章服飲至豐澤園

賚銀幣復以烏什為回部要地

詔玉素卜弟阿卜都拉任烏什阿奇木伯克二十六年

議塔勒納沁居屯田兵興版築玉素卜請助役不

受工值



獎賚幣及服飾復

諭優給口糧示恤冬十月

諭曰前因額敏和卓玉素卜皆回部舊人若令伊等更替駐劄辦事於新疆有益去年玉素卜來京曾諭令在哈密休息年餘今額敏和卓當還吐魯番休息以玉素卜往代玉素卜著即整裝候此次入覲回人等至哈密時即同護送之乾清門侍衛等帶領前往著授叅贊大臣應得公項照例支給伊子伊勒巴喇伊

木看守游牧著加恩賞戴孔雀翎二十八年玉素卜  
就道額敏和卓以遣使巴達克山索布拉呢敦尸  
及其孥仍留葉爾羌

詔玉素卜暫理阿克蘇務冬巴達克山事竣玉素卜住  
代三十年烏什逆回賚哈木圖拉等糾衆叛副都  
統素誠偕阿卜都拉遣呢雅斯走阿克蘇告變素  
誠尋自殺

詔伊犁將軍明瑞往勦會阿克蘇伊什幹伯克薩里弟

額敏自烏什脫出告阿卜都拉遣屯田兵赴伊犁  
不給糧畜且科濟羊四百徵回人銀被賊擒禁復  
納女賚哈木圖拉為免死計阿克蘇辦事副都統  
卞塔海以

聞

諭曰阿卜都拉被回人拘禁朕尚以阿卜都拉係玉素  
卜之弟必不肯屈節今觀伊平日縱容所屬侵蝕回  
人銀兩又納女於賚哈木圖拉希圖臨難苟免此與叛

逆何異豈可以其為玉素卜之弟遂從寬貸著明瑞  
至烏什日務將此等情節查訊明確若果所傳不妄  
非獨逆回等當族誅示懲即阿卜都拉亦宜明正典  
刑玉素卜奏臣弟阿卜都拉擾回衆致債事臣素失  
訓請議罪

諭曰阿卜都拉以阿奇木伯克縱所屬人等滋擾激變  
罪由自取與玉素卜無涉著加恩免其議處時阿卜  
都拉被賊擒賚喀木圖拉奪其女將納之逆妻有

怨言乃止因戕阿卜都拉復禁其女及子大軍既  
定烏什明瑞訊賊黨得情疏

聞

詔釋阿卜都拉孥歸哈密三十一年玉素卜遵

旨自葉爾羌歸奏哈密齒日繁請遣戶五百屯伊犁以  
次子伊薩克護往

允之伊薩克自伊犁歸

詔授二等台吉玉素卜尋攜長子伊勒巴喇伊木入

覲中道皆疾卒以伊薩克襲

五次襲伊薩克玉素卜次子乾隆三十二年襲郡王品級扎薩克多羅貝勒三十六年入

覲

賜三眼孔雀翎黃馬褂

命乾清門行走三十八年

詔授領隊大臣赴伊犁轄屯田回民四十一年

諭歸哈密四十五年卒子額爾德錫爾襲

六次襲額爾德錫爾伊薩克長子乾隆四十五年襲郡王品級扎薩克多羅貝勒五十三年奉

上諭哈密吐魯番二部皆國家世僕其餘各城回人雖經朕平定新疆時歸降但効力幾三十年奮勉急公是以分別施恩賞給王貝勒貝子公台吉等封爵乾隆四十八年該院照例查明伊等封爵或定世襲罔替或定為出缺後降等承襲雖係照例辦理但伊等來歸年久共感朕恩各勤職業即如哈密郡王品級

貝勒額爾德錫爾之始祖額貝都拉歸誠以來已歷  
數世額爾德錫爾之祖玉素卜在軍營勤勞懋著貝  
子鄂斯瑞之父鄂對在軍營奮勉封授貝勒品級因  
罪削爵後鄂斯瑞仍諸事抒誠効力復封貝子色提  
卜阿勒氏先在軍營奮勉又在阿奇木伯克任內數  
年留心辦事公伊巴喇伊木一等台吉鄂囉木咱卜  
二等台吉巴巴阿布勒丕爾敦三等台吉阿卜都呢  
咱爾帕爾薩伊等封爵或因軍前効力封授或因伊



祖父功績賞給若照院議於出缺後降等承襲日久  
遞降非朕久遠撫恤回衆之至意今施恩將議定降  
等承襲之額爾德錫爾色提卜阿勒氏鄂斯瑞伊巴  
喇伊木鄂囉木咱卜巴巴阿布勒丕爾敦阿卜都呢  
咱爾帕爾薩等十人現襲之王貝子公台吉等封爵  
出缺時不必降等承襲俱著世襲罔替以示朕優恤  
回僕之至意併交該院行文各回城大臣將朕此旨  
通行曉諭衆回人等交相欣慶

欽定四庫全書

欽定外藩蒙古回部王公表傳

欽定外藩蒙古回部王公表傳卷之一百八

欽定四庫全書

欽定外藩蒙古回部王公表傳卷之一百九

傳第九十三

吐魯番回部總傳

吐魯番回部在嘉峪關外至

京師八千三百五十里東界哈密西界喀喇沙爾南至沙磧北至博克達山為天山界邑二十有九曰塔呼曰納呼曰齊克塔木曰特庫斯曰洪曰舒歸

曰色爾奇布曰魯克沁曰闢展曰英格曰喀喇和  
卓曰阿斯塔納曰玉門口曰勒木丕曰交河城曰  
雅木什曰安吉彥曰波袞曰托克遜曰伊拉里克  
曰勒木津曰雅土溝曰漢墩曰蘇巴什曰僧吉木  
曰罕和囉曰穆爾圖拉克曰布拉克曰濟木薩  
皆吐魯番屬漢為車師前王庭地唐宋稱吐蕃元  
明稱吐魯番今仍之設扎薩克一居吐魯番城別  
設官兵五百屯闢展以駐防大臣領之順治三年

吐魯番蘇勒檀阿布勒阿哈默特阿濟汗遣都督瑪  
薩朗琥珀峯等奉表貢

詔京師會同館及蘭州予市以官役監勿市熟鐵與軍器  
違者罪

諭曰吐魯番乃元成吉思汗次子察哈岱受封之地前明  
立國隔絕二百八十餘載今幸而復合豈非天意乎爾  
等誠能恪修貢職時來朝賀大貢小貢悉如舊例則恩  
自相加豈有忽忘之理爾國所受有明敕印可遣使送

來以便裁酌授爾封爵蘇勒檀者猶蒙古稱汗明成化  
時酋號如之六年河西逆回丁國棟等叛據肅州  
陰通哈密煽吐魯番助掠內地民大軍定肅州斬  
吐魯番頭目哈什克伽等閉嘉峪關絕貢十年吐  
魯番使穆蘇喇瑪察帕克等叩關請貢表署蘇勒  
檀賽伊特汗甘肅提督張勇責盡歸內地人民乃可  
十二年回使克拜齋葉爾羌表至獻內地民十五  
人以拜城薩麻罕諸地使從表署阿布都喇汗勇

斥不盡歸內地民詰表異名違例故克拜告曰哈  
密吐魯番葉爾羌長皆昆弟其父曰阿都喇汗居  
葉爾羌卒已久有子九長即阿布都喇汗居葉爾  
羌次即阿布勒阿哈默特汗居吐魯番先二年卒  
次蘇勒檀賽伊特汗嗣之次巴拜汗居哈密以得  
罪

天朝故為葉爾羌長所禁阿布勒阿哈默特汗子代之次  
瑪哈默特蘇勒檀居帕力次沙汗居庫車次早死



次伊思瑪業勒居阿克蘇次伊卜喇伊卜居和闐  
前葉爾羌汗遣其弟自吐魯番請貢故表稱吐魯  
番汗名今以葉爾羌汗為昆弟長故表稱葉爾羌  
汗名察歸內地民百五十為準噶爾巴圖爾琿台  
吉所掠存者僅十五人謹以獻小國不諳大體歸  
易表逾期乃獲至請即納貢

上嘉遠道誠

詔允之時青海台吉袞布憾葉爾羌嘗奪其屬將以兵襲

貢使偵甘肅巡撫周文煜徙貢使入甘州且嚴備  
馳遁明年貢使至京初議遣十人入

覲請益乃定額三十人從者三百留肅州請給糧賞川陝  
總督金礪奏前明羈縻外番多陋習吐魯番貪無  
厭入貢輒攜四五百人詭稱質孥不以歸牟利內  
地潛通哈密以故甘肅五郡回衆日多致滋前變  
今雖悔罪通貢然初至輒多攜男婦喋索糧物若  
仍聽留內地久將滋患

上可其奏

賜吐魯番貢使宴定賞額獨峯駝四給緞絹各十二西馬  
一給緞絹各二蒙古馬三百二十四給緞絹如馬  
數璞玉千斤給絹三百餘物各給緞絹有差貢使  
分五等一等給緞絹各五襲衣一餘以次減尋  
遣歸以吐魯番貢久仍

賜敕曰爾吐魯番早識時數貢賦維謹今又遣使入貢誠  
篤之意實可嘉悅念爾國遠隔山河跋涉不易宜酬賞

賚用勸忠誠今遣歸來使特賜爾緞三百三十八疋絹七百二十疋以昭寵錫之意自此以後著五年一次進貢貢使人關不得過百人不許攜帶婦女進京人數止許三十人餘留住甘肅俟來京進貢人歸一齊出關不得久留內地所帶貨物許在京會同館照例互市無得沿途借端遷延滋擾其進貢馬匹止大馬四匹又蒙古馬十五匹此外不許多貢用昭朕優恤遠人之意康熙十二年吐魯番使烏魯和卓等至貢西馬四蒙古馬

十五璞玉千斤表稱禍木特賽伊特汗署一千八  
十三年奏臣國向以方物入貢聞

天朝統一寰區私冀

恩寵過故明貢物視舊增蒙

諭貢期馬額臣國亂以故不獲如期至嗣仍前例或別定

額惟

命

諭吐魯番道遠貢艱嗣今自璞馬外餘物免進二十年吐

魯番使伊思喇木和卓等貢璞馬如前額表署阿  
布勒穆咱帕爾蘓勒檀瑪哈瑪特額敏巴圖爾哈  
什汗奏

天朝都極東吐魯番居極西道遠請

賜恤

詔免貢馬二十五年役遣使烏魯和卓至表稱臣成吉思  
汗裔承蘇賚滿汗業謹守疆界向風殊切今特遣  
獻方物向入貢頭目所携僕從多留駐甘肅後漸

析寓西寧請遣歸便臣使往來

詔察吐魯番屬無居西寧者

遣使歸

諭所部知之三十四年大軍議征噶爾丹先是準噶爾台  
吉噶爾丹強脅吐魯番為已屬兄僧格子策妄阿  
喇布坦與構怨攜父僧格舊臣七人走吐魯番尋  
徙和博克薩哩吐魯番為策妄阿喇布坦屬至是  
刑部尚書圖納請檄吐魯番令知罪祇噶爾丹勿

驚懼

詔允之三十五年噶爾丹敗遁葉爾羌汗阿卜都賽伊特  
自軍所降告葉爾羌有兵二萬吐魯番有兵五千  
請攜努赴吐魯番宣

聖德偕策妄阿喇布坦擒獻噶爾丹

上憫其情

遣歸噶爾丹尋走死策妄阿喇布坦師噶爾丹詐復不靖  
五十四年陰以兵襲哈密



詔議大軍進勦事宜西安將軍席柱奏吐魯番隣哈密且  
準噶爾隘當先取沿途設站運米屯兵巴里坤布  
隆吉爾俟馬壯由哈密北大山後烏蘭烏蘇路進  
開展取吐魯番傳檄哈薩克布魯特諸部協勦策  
妄阿喇布坦

詔俟明年勦吐魯番五十五年議暫停進兵散秩大臣祁  
里德奏俟來年由巴里坤勦吐魯番乘勢取珠勒  
都斯地

諭軍所大臣等定議五十六年靖逆將軍富寧安請遣巴里坤兵分擊烏魯木齊及吐魯番

諭曰大兵前進攻取吐魯番地招撫之即與哈密類既入國家版圖自不得不善為保護若襲擊兵勢稍弱準噶爾擁衆援吐魯番或吐魯番有變志彼時不能守視必將得而復失著軍前大臣詳加籌議尋奏大兵抵吐魯番視易攻易守乃取之否則襲擊而還

諭嚴設備富寧安以兵抵烏魯木齊擒賽因塔喇諸邑回

人百餘振旅還五十九年散秩大臣阿喇納以兵  
赴關展魯克沁吐魯番諸城諭曰大兵征準噶爾  
非仇爾也若不速決計將破爾城悔無及矣回衆  
乞降納畜械各五百餘撫其衆以總管沙克扎拍  
爾頭目阿克蘇勒坦等歸別有吐魯番頭目曰阿  
濟斯和卓者不即降走準噶爾大軍旋策妄阿喇  
布坦授之兵脅吐魯番戶數千徙喀喇沙爾中道  
脫歸者千餘戶聚魯克沁以托克托瑪木特為總

管拒準噶爾兵六十年議政大臣等請令富寧安  
統大軍屯烏蘭烏蘇別選兵取吐魯番得地即以  
兵守會吐魯番回人阿喇布坦等抵富寧安軍訴  
回衆不堪準噶爾虐約內附且獻所獲準噶爾甲請  
大軍援

諭曰策妄阿喇布坦既不能徙回人赴喀喇沙爾又不能  
護衛準噶爾足見萬不能敵我軍此機斷不可失今收  
復吐魯番若不守視恐自準噶爾來歸者回人妄行殺

掠此路必致阻隔著富寧安簡兵一千赴吐魯番收納  
降回留兵駐視回人等歸降於我與準噶爾世成仇敵  
即係我民巴里坤距吐魯番止六百里如策妄阿喇布  
坦率衆侵擾我師往援為途不遠富寧安預飭回人於  
我師尚未抵境時若有準噶爾使及逃人至萬勿隱匿  
侵犯即行解送時準噶爾博斯和勒額穆齊宰桑以兵  
襲吐魯番托克托瑪木特等乞援撫遠大將軍固  
山貝子允禔偕富寧安等議大軍征準噶爾賊必

竄留兵少無濟多則糧運艱不留兵魯克沁回衆  
萬必乞內徙不收撫師旋後恐厄魯特來之欲收  
撫恐無以資口食徙屯哈密恐地狹不給徙布隆  
吉爾達里圖沙磧難行且喀喇沙爾諸城邇吐魯  
番大軍至相繼附必請留兵護以故不即進

申命之乃遣阿喇納以兵二千馳援吐魯番副都統莊圖  
穆克登各督兵二千繼之別以兵八千屯鄂隆吉  
科舍圖色畢特伊勒布爾和碩路為應阿喇納抵

吐魯番遇準噶爾賊二千餘迎擊之賊棄騎走俘  
斬百餘

詔興屯吐魯番六十一年議遣巴里坤兵五千赴吐魯番  
築城墾地輓糧守汛防禦準噶爾賊雍正二年吐  
魯番納屯糧五千餘石嗣歲報獲數以贏計三年  
撤大兵還

諭曰策妄阿喇布坦乞和請給吐魯番地朕因諭將從前  
內附諸酋長徙入內地據將軍穆克登奏吐魯番回衆

共萬餘若但徙首領數人不遷所屬生計必致艱窘且  
伊所屬回人願內徙者甚衆朕思瓜州沙州地甚寬廣  
亦必用人耕種若有願移徙者可即給一二年養贍令  
其耕種羅卜諾爾回人亦照吐魯番例有願移者從所  
部酋長至不願者仍留本處大軍之屯吐魯番也羅卜  
諾爾頭目固爾班等至請以喀喇和卓喀喇庫勒  
邑千餘衆內附羅卜諾爾鄰吐魯番為巨澤葉爾  
羌喀什噶爾諸境水六十餘漚之回衆習水居稱



不便徙內地

詔聽之闢展魯克沁吐魯番諸城回衆徙至者六百五十

戶

詔給駝馬廬幙四年安置肅州金塔寺威魯堡諸地以托  
克托瑪木特為總管六年托克托瑪木特與闢展  
頭目伊特格勒和卓以違言故搏斃川陝總督岳  
鍾琪遣諭曰爾等久為準噶爾虐蒙

思內徙今因私忿輒爭若仍聚處恐相激生變必視內地

律治罪爾等去留惟便回衆謝罪固請留

諭嗣勿妄滋釁違者論死八年寧遠大將軍岳鍾琪統大軍屯巴里坤私遣使赴吐魯番載軍糧會入

覲準噶爾襲汎盜駝馬總兵樊廷等馳擊之敗遁九年護理寧遠大將軍紀成斌偵準噶爾侵吐魯番遣兵援

諭責之曰紀成斌聞賊侵吐魯番遣樊廷等統兵四千往援實為錯謬從前採買吐魯番糧石本應給與運價令

其自送軍營計不出此遣官兵發駝馬遠行運送致啟賊心去冬逆夷猖獗後猶不將運糧弁兵撤回此則踈忽之甚者也惟是朕以怙冒萬方為心若坐視吐魯番被寇侵掠而不為之籌畫保護朕心實所不忍前曾降旨吐魯番衆若畏懼準噶爾即移向近地居住是以托克托瑪木特帶領之人移駐近邊者皆享安寧之福可再行曉諭回人等倘自量力不能敵不妨仍為移避之計朕當從厚賞給行資使之得所若此番曉諭後伊等仍

復觀望不至則賊人再來侵掠時聽伊等自為計我軍不復往護之矣

命甫下樊廷兵抵吐魯番準噶爾遁師還準噶爾復來襲吐魯番乞援師不復遣

諭曰準噶爾賊侵吐魯番徒欲疲勞我士馬故為此出沒詭計朕閱紀成斌奏即嚴加申飭賊人未見我師果潛遁無踪矣賊之狡獪如此是以諭令吐魯番人衆商酌遷移暫避之計蓋欲善為保全之以俟大軍凱旋共享

昇平福也今準噶爾復侵吐魯番大營未曾發兵前往朕思賊人若仍以千餘衆侵擾吐魯番彼地城垣兵力自足捍禦倘賊復傾衆至吐魯番力不能支朕心有所不忍況伊等前次感恩望濟之言甚為懇切朕又有令其遷移暫避之旨料賊人必知之倘乘其遷移之際而侵害劫掠吐魯番人因遵旨而受累尤朕心所惻然者也著岳鍾琪酌視應否往援變通辦理不必固執前說至賊衆去後吐魯番回有情願遷移者又如何沿途防

護不受賊人劫奪侵掠著岳鍾琪悉心經理會肅州威  
魯堡回民告饑

諭曰前因準噶爾肆虐吐魯番回民畏其侵掠有願移居  
內地者諭令地方有司善為安置撫綏使之寬裕從容  
得所頃聞在肅州居住回民等因瘠水少收成歉薄所  
有牲畜亦不敷用生計未免艱難著署陝甘總督查即  
酌定加恩撫理事宜即以此諭吐魯番移駐內地回  
民知之鍾琪尋奏領準噶爾圍魯克沁請率兵三千馳

進賊遁即駐吐魯番

諭曰朕恐準噶爾賊以大力侵吐魯番伊等不能抵敵為其所困已降旨令岳鍾琪酌量發兵應援若果確有所見即應遣兵速往吐魯番乃阿爾護喀喇沙爾兩路關鍵既駐我軍將來築城烏魯木齊時呼吸相應賊人不敢襲我軍後況我軍正欲進攻準噶爾賊若賊果以大衆犯吐魯番我軍不勞遠行可以殄滅亦為善策爾其悉心籌議鍾琪奏遣總兵張元佐率兵三千赴吐魯番

別以兵六千屯塔呼及洮賚隘準噶爾賊圍魯克沁越四旬餘不下復以木梯三百攻喀喇和卓回衆拒斬五百餘級賊聞我師將至棄甲械竄

上以準噶爾數擾吐魯番雖失利將復增衆至我軍往援不值誤自取糧吐魯番始致進退兩失之

飭責岳鍾琪罪準噶爾尋侵吐魯番副將王廷瑞等擊斬二百餘賊遁

諭曰此次幸獲小勝不足為喜朕更為吐魯番憂之賊人



屢被吐魯番敗創懷恨益深必復以大衆報復可速傳  
諭吐魯番衆嗣後賊人來犯但當堅守城池不可迎戰  
若魯克沁一城可容回民人衆則令防守官兵堅守一  
城如一城不能容住多人可別住相近之喀喇和卓等  
處將馬匹牧畜收歸城中預貯芻薪以備應用賊衆若  
分兵來圍彼此固守堅壁清野俾賊無所肆其伎倆且有  
大軍襲其後奪取馬匹坐致疲斃自必遠遁然亦不可  
追逐賊衆長於騎射吐魯番回民十不及一若固守城

垣以拒敵賊人亦不及回民十之一用我之長乘彼之短此萬全無弊道也凡事當持重慎靜為之但能保護吐魯番城垣人衆其功勝殺賊多矣十年準噶爾遣宰桑額爾克得松犯喀喇和卓叅將劉琰等鏖擊之賊敗走護理大將軍印務張廣泗奏吐魯番孤懸一隅舊設駐防兵八千自運糧兵五百外分屯各邑而勒木津塞木津漢墩三邑逼賊營請撤兵歸魯克沁喀喇和卓闢展英格四邑并令喀喇和卓

諸邑回衆聚魯克沁絕賊同志從之時北路軍大  
敗準噶爾賊於額爾德尼昭賊創甚不敢復襲西  
路

諭曰賊人於北路大創後力量衰弱不能復侵擾吐魯番  
回民乘此遷移似屬應行朕思回民誠心內向屢拒賊  
鋒甚屬可嘉而冬月寒冷之時倉皇竄徙又甚可憫除  
在途加意防護外伊等至日務須安置妥協重加賞賚  
出其望外使老幼男婦咸慶得所不可為愛惜錢糧起

見致負遠人內附之心也尋吐魯番頭目額敏和卓率

回衆就道

上聞之

諭曰吐魯番遠在邊境外距巴里坤軍營尚有七八百里  
易為賊所窺伺我師難以庇護朕以仁愛為心是以聽  
其自便不強令歸順我朝致受賊人侵擾乃前歲岳鍾  
琪并未奏聞直以已意遣官帶領駝隻前往採買米石  
致啓賊人侵擾額敏和卓與回衆等誠心歸順我朝奮

拒賊兵上年賊衆三次圍攻回衆與官兵并力抵禦不  
但全城無恙且出不意來間擊刺屢挫賊鋒忠勇之氣  
甚屬可嘉然賊夷狡獪無常時以侵擾吐魯番為疲敝  
我師計是以議徙爾等近邊以避賊人侵害朕念爾等  
內徙之時賊人或於中途窺伺又恐男婦老幼行役苦  
寒屢降諭旨俟至日善為安置務令人人得所數月以  
來朕無時不以爾等安土重遷縈繫於心也今聞陸續  
啓行羣情踴躍朕心甚為欣慰因思年來爾等屢遇強

寇未遭戕害嗣此安居樂土世受我朝恩庇此皆爾等  
忠誠感格

上天寵錫福佑之明徵也著授額敏和卓為扎薩克輔國  
公其餘有應加恩賞授官職者俟大將軍查奏到日再  
降諭旨已而吐魯番回衆屯塔勒納沁查郎阿奏請安  
置肅州王子莊

諭曰回民輸誠向化自應選給水土饒衍氣候和煦之地  
俾得樂業安居肅州王子莊水泉甚少亦不敷耕種朕

思瓜州地土肥饒水泉滋潤氣候亦和與吐魯番回民  
原駐地風景相似且現在開墾地甚為寬濶庶足資回  
民耕牧由塔勒納沁遷至瓜州地不甚遠可免跋涉勞  
著署陝甘總督劉于義將吐魯番回衆安置瓜州其築  
堡建屋給賜口糧牛具穀種各事宜著查郎阿自軍營  
遣武職大員先赴瓜州會同悉心妥辦并遣官沿途護  
視回衆明年奏吐魯番自塔勒納沁徙瓜州凡八千一

十三口

詔廩給如初至額勿議減尋定所部頭目功次一等給正千戶二等副千戶三等正百戶四等副百戶各頒號紙乾隆二年定吐魯番來朝廩給限四旬扎薩克視喀爾喀輔國公正千戶視佐領副千戶而下視驍騎校十九年

遣官赴瓜州編旗隊置管旗章京副管旗章京叅佐領驍騎校各員如哈密例二十年瓜州回兵三百從大軍征達瓦齊軍機大臣奏吐魯番舊係內地俟



準噶爾定察獲頭目安置之併遣瓜州扎薩克歸  
報可定邊右副將軍薩拉爾奏遣瓜州扎薩克佐領愛  
特瑪特賫檄招吐魯番有伯克莽噶里克者遣使納  
戶籍四百餘

頒賜貂冠朝珠而莽噶里克率回兵百五十將赴薩拉  
爾軍道遇布爾古特賊掠駝馬不達而返復偕弟  
阿里尼咱爾集兵七十餘就道迎降定西將軍永  
常納戶籍千餘永常遣莽噶里克歸牧阿里尼咱

爾赴薩拉爾軍疏

聞書其名曰莽里克

上詢同異故以莽里克即莽噶里克告莽噶里克祖曰  
瑪爾占楚克父曰圖默爾庫濟世居吐魯番為總  
管莽噶里克嗣稱達爾漢伯克有綽囉斯台吉噶  
爾藏多爾濟輝特台吉已雅爾者準噶爾屬游牧  
額琳哈畢爾噶鄰吐魯番聞大軍至請降已雅爾  
以乏畜產告永常遣赴吐魯番耕牧檄莽噶里克

給穀種大軍尋抵伊犁定北將軍班第奏吐魯番  
舊頭目莽蘇爾為元太祖裔居喀喇沙爾應遣歸  
吐魯番轄舊屬至瓜州回衆請遣官護歸魯克沁  
軍機大臣議奏額敏和卓徙歸邇吐魯番頭目牧  
恐不相安俟勘界定乃議徙達瓦齊既就擒撒瓜  
州兵歸尋阿睦爾撒納叛擾伊犁莽蘇爾不獲歸  
吐魯番偕弟哈什木走葉爾羌後大軍定逆回霍  
集占亂乃獲之以歸

詔授一等台吉隸蒙古正白旗二十一年薩拉爾自伊犁歸吐魯番莽噶里克迎告曰噶爾藏多爾濟等盟侯擒阿睦爾撒納將以子諾爾布琳沁轄四衛拉特抗

天朝師薩拉爾以

聞

詔勿遽聽回人言滋疑慮尋陝甘總督黃廷桂獻額敏和卓繪吐魯番圖奏吐魯番不復有蒙古裔瓜州

回民願歸故土請視舊納準噶爾賦為貢額

詔俟厄魯特靖乃徙復

諭曰伊等進貢方物若原係噶爾丹策凌之人今伊犁既定自應充作貢賦如係噶爾藏多爾濟及巴雅爾等所屬此番遷回故土應仍歸伊等管轄方為允協已而阿睦爾撒納竄哈薩克

詔徙瓜州回衆歸魯克沁莽噶里克請偕弟額什哩木子呢雅斯入

覲

詔留視牧以子弟一人代莽噶里克遣子白和卓至且  
請視額敏和卓例編置旗隊

允之授公爵軍機大臣議奏吐魯番東界自開展至喀  
喇和卓令額敏和卓轄西界自伊拉里克至阿斯  
塔克令莽噶里克轄又額敏和卓請給麥種千石  
俟來歲倍納租自第三年始每年納四千石莽噶  
里克如之應各酌賞示勵又額敏和卓請設汎扎

里布拉克塔呼納呼齊克塔木闢展五邑每汎兵  
五馬十請令莽噶里克并設汎伊拉克諸邑從  
之未幾噶爾藏多爾濟以巴雅爾叛告寧夏將軍  
和起攜索倫兵百往勦檄額敏和卓莽噶里克兵  
集闢展而噶勒雜特宰桑哈薩克錫喇布魯古特  
台吉呢瑪陰應巴雅爾詭以兵千五百會和起望  
兵至疑之遣莽噶里克往偵莽噶里克紹曰我兵  
也逾時呢瑪等操戈前莽噶里克自後譟和起偕

從兵百死之

詔安西提督傅魁馳往勦會白和卓入

覲旋抵哈密就擒謀者以噶爾藏多爾濟及從子扎納  
噶爾布叛附呢瑪召莽噶里克莽噶里克不從且  
遣兵助額敏和卓告

諭駐防巴里坤辦事大臣雅爾哈善曰此不過伊子白  
和卓未歸謬為恭順之狀未可輕信已令傅魁領兵  
會同額敏和卓密商辦理仍著傳諭傅魁俟見莽噶



里克時即諭知伊子現在肅州并未加罪伊或親赴肅州即行解京候朕辦理二十二年春傳魁兵次鹽池莽噶里克攜厄魯特俘一馘十二迎告曰厄魯特虐我甚我子入

覲不即歸以故擒獻厄魯特賊且將迎我子傳魁以執而獻非已功磔莽噶里克及從者十九人詭稱道遇莽噶里克擊斬三十三級

上以賊迎赴我軍且從者寡不俘獻反聚殲之情必詐

詔械傳魁至

廷訊悉欺罔狀予辟宥白和卓罪自吐魯番取其妻默  
里克及弟托克托納咱爾等至隸蒙古正白旗後  
白和卓由三等侍衛任鑲黃旗蒙古副都統莽噶  
里克既死額敏和卓自魯克沁馳赴吐魯番擒斬  
其從逆宰桑十餘人

詔徙居吐魯番魚轄莽噶里克屬戶五百餘會霍集占  
使詭入

覲額敏和卓遵

旨將遣屬赴葉爾羌書示莽噶里克獲罪誅吐魯番歸  
已轄故令霍集占悔罪內附噶爾藏多爾濟等梗  
道不果往大軍勦之敗遁其屬回沙呼里唐噶塔  
爾等攜戶百餘走魯克沁

詔隸吐魯番扎薩克

諭曰伊等久為噶爾藏多爾濟屬倘有潛通噶爾藏多  
爾濟之事乘間逃葉爾羌喀什噶爾等處俱未可定

著額敏和卓加意防範如尚屬安靜即令其種地謀生  
形迹稍有可疑即奏聞請旨辦理有沙拉斯瑪呼斯  
者準噶爾二十四鄂拓克之二也居喀喇沙爾之  
海杜河西以庫爾勒伯克托克托鄰牧掠之托克  
托挈弟阿卜都賚子色提克由羅卜諾爾走吐魯  
番請內附授散秩大臣秩二品其屬瑪木特托爾  
岱尋攜庫爾勒衆百餘至

詔隸吐魯番有潛遁者誅之二十三年戶部侍郎阿里

袞勦沙拉斯瑪呼斯賊兵抵羅卜諾爾羅卜諾爾  
舊有戶二千餘內附後不即徙準噶爾虐其衆因  
奔徙阿克蘇多倫諸城存者六百餘聞大軍擒達瓦  
齊遣使攜鶴貢抵吐魯番值莽噶里克叛不達至  
是伯克哈什哈呢雅斯呼里等獻戶籍請降阿里  
袞慰令暫隸吐魯番轄大軍尋討霍集占額敏和  
卓以吐魯番兵從抵葉爾羌護衛錫丕呢雅斯等  
擊賊獲傷

獎賜翎頂明年春傷痊復固請從勦賊

詔給銀幣二十五年副管旗章京呼岱巴爾氏叅領瑪  
哲克勒木佐領瑪木特克勒木護衛阿瑞密喇木  
驍騎校蘇爾等以勦喀什噶爾逆回邁喇木呢雅  
斯等功得

優賚二十六年二月陝甘總督楊應琚奏肅州威魯堡  
安置吐魯番回民計二百五十戶墾地萬五千三  
百六十餘畝戶口日增地畝有限請遣千戶如

拉等歸吐魯番

詔廷議尋奏肅州回民較初附增額吐魯番已成樂土  
且多可耕地應視瓜州回民例悉遣歸但千戶玠  
如拉祖托克托瑪木特與額敏和卓俱被準夷虐  
先後歸應酌給附闢展吐魯番可耕地俟秋收後  
徙往并以千戶玠如拉百戶伊明和卓為正副伯  
克令闢展大臣徵賦從之三月

諭曰從前辦理回人莽噶里克後因伊屬人無所統束

暫令安置吐魯番交額敏和卓管理今大功告成回  
部皆朕臣僕自應各統其屬不相兼并朕意將此項  
回人內擇其賢能者授為伯克等職仍安置舊處  
查明舊日賦役照例供辦又阿里袞前因追賊至羅卜  
諾爾所收回人亦照此例辦理七月舒赫德奏附闕  
展之連木齊木有地六千畝闕展英格二邑有地  
千餘畝請令千戶瑚如拉徙舊居魯克沁衆赴連  
木齊木百戶伊明和卓徙舊居闕展英格衆歸故



地按戶給田以瑚如拉伊明和卓授五品伯克別  
設六品副伯克二分轄九月奏羅卜諾爾部二一  
為喀喇庫勒一為喀喇和卓喀喇庫勒置伯克一  
約束難周請增一員協理喀喇和卓凡五邑各置  
伯克一不相屬請令二員總管二員協理別設小  
伯克一居吐魯番理賦役屬戶百八十三每年納  
哈什翎百枝海倫九張

詔廷議尋奏羅卜諾爾前以軍務未竣暫隸額敏和卓

今回部蕩平自應一體辦理請定總管伯克秩五品  
協理伯克及理賦役伯克秩六品五品缺出由關  
展大臣奏請六品缺出即行補授具奏納賦如前  
額十月舒赫德奏吐魯番莽噶里克屬及額琳哈  
畢爾噶之沙呼里烏默特等屬舊隸額敏和卓轄  
給官穀充吐魯番役今僉稱安置久不願徙請以  
莽噶里克屬戶五百餘設總管四品伯克一協理  
五品伯克二分理六品伯克五沙呼里等屬戶七

十四請即以沙呼里為總管五品伯克烏默特為  
協理六品伯克統隸開展大臣轄二十七年開展  
辦事郎中德爾格奏開展屯田兵裁二百四十所  
遺地畝舊以吐魯番額敏和卓屬六十戶居開展  
九十三戶居連木齊木威魯堡珈如拉屬六十戶  
居連木齊木二十七戶居英格每戶給田五十請  
令額敏和卓屬歸開展珈如拉屬歸連木齊木以  
便約束仍有餘田三千畝分給莽噶里克沙呼里

回人等墾耕至裁汰兵丁所餘牲畜農具請量給  
威魯堡回人令納糧抵

詔悉如議復

諭吐魯番免納糧以喀喇和卓托克遜屯田給回民為  
世業所部旗一爵三扎薩克多羅郡王一附一等  
台吉一二等台吉一

欽定外藩蒙古回部王公表傳卷之一百九

欽定四庫全書

欽定外藩蒙古回部王公表傳卷之一百十

傳第九十四

扎薩克多羅郡王額敏和卓列傳

額敏和卓吐魯番回部人祖素丕和卓為喀喇和卓阿璉父呢雅斯和卓為吐魯番大阿璉額敏和卓嗣聚族居魯克沁康熙五十九年大軍撫吐魯番額敏和卓族以魯克沁降軍旋準噶爾脅徙喀

喇沙爾固拒之遣使告內附數乞援軍雍正四年  
頭目托克托瑪木特攜回人六百餘內徙魯克沁  
有衆萬不盡行以額敏和卓轄之八年寧遠大將  
軍岳鍾琪奏額敏和卓歲勤屯田務

賜銀幣九年準噶爾侵魯克沁及喀喇和卓額敏和卓閉  
城伺間擊賊退而至者三皆創之我軍至賊遁額  
敏和卓出郭迎十年遵

旨攜魯克沁回衆內徙

詔封扎薩克輔國公十一年置瓜州

詔視內地官祿支糴米乾隆二十年以兵三百從大軍征達瓦齊檄招吐魯番達爾漢伯克莽噶里克內附事詳總傳伊犁定撤還阿睦爾撒納叛遵

旨遣所部兵從和碩特輔國公納噶察將赴阿克蘇宣諭伯克霍集斯勿附逆

諭曰額敏和卓帶領回兵直抵伊犁甚屬奮勉今復派伊所屬兵丁前赴阿克蘇城著加恩封鎮國公復以



所部兵甫自伊犁旋輒遠道行

詔優給裝資已而謀阿睦爾撒納竄博羅塔拉

詔停赴阿克蘇二十一年額敏和卓自瓜州歸魯克沁  
尋以兵四百迎會寧夏將軍和起剿逆賊巴雅爾  
抵闢展厄魯特及莽噶里克兵驟叛戕和起將擒  
額敏和卓莽噶里克謂厄魯特曰此回人也乃釋  
歸魯克沁莽噶里克旋召之不赴遣告變

諭曰額敏和卓係輸誠最久之人感激厚恩遣人報信

朕甚嘉予伊身在賊中實深軫念現在甫從瓜州遷  
至彼處諸務未經整理豈有擒賊之力如能誘擒莽  
噶里克固屬甚善俟奏凱後其地方悉交伊管轄倘  
力有不能惟將駐劄地方嚴加防範靜候內地大兵  
前往即可勘定額敏和卓尋遣子素賚瑞至哈密稱  
固禦賊乞大軍援哈密扎薩克貝子玉素卜以

聞

諭曰額敏和卓拒賊固守甚可嘉予著加恩封授貝子

其子素賚瑞著賞給公品級以示獎勵安西提督傳  
魁著選兵五百帶同素賚瑞馳赴額敏和卓游牧應  
援倘兵力不足即著額敏和卓帶領屬人同傳魁回  
至哈密俟大兵到彼再行辦理二十二年春

諭曰前降旨令傳魁領兵擒拏莽噶里克後留兵駐吐  
魯番俟大兵至進剿厄魯特逆賊今思莽噶里克就  
擒之後其地即給額敏和卓管轄留兵在彼守候大  
兵尚須時日額敏和卓轉不無供應兵丁之費非所

以示體恤著駐劄巴里坤辦事大臣雅爾哈善等飭  
知額敏和卓如辦理莽噶里克事竣會同伊所屬回  
人力足以擒剿巴雅爾即令其同傳魁領兵辦理否  
則即將內地兵全行撤回不必在彼駐劄倘額敏和  
卓懇請留兵一二百名以為聲援亦從其便莽噶里  
克亂定遵

旨從吐魯番請遣子素賚瑞入

覲謝

賜爵恩

詔馳驛至秋以逆回布拉呢敦霍集占叛據葉爾羌喀  
什噶爾議遣大兵討罪

諭額敏和卓曰布拉呢敦霍集占二賊前被準噶爾囚  
繫朕特加恩俾仍領舊部乃負恩黨逆戕害我副都  
統阿敏道其罪必不可逭然皆二賊狡謀其脅從回  
衆尚屬可宥爾受朕厚恩且係回部望族為衆所信  
若能設計誘擒或使回衆離心執獻二賊更可不勞

師旅爾即酌量辦理若必需用兵若干應於何時進剿爾即據所見密奏額敏和卓疏至

諭嘉之授領隊大臣時喀喇沙爾之沙拉斯瑪呼斯等賊以徙牧叛遁額敏和卓遵

諭遣謀喀喇沙爾復以俟謀至遣兵恐不及期自率兵赴托克遜以待

獎協機宜

賜幣復

諭曰明歲辦理葉爾羌喀什噶爾時雖有將軍大臣而  
回部情形爾所熟悉將命爾參贊軍務在前隊行走  
爾其益體朕恩實心奮勉以奏膚功永膺懋賞額敏  
和卓偵喀喇沙爾無賊踪遣謀呼魯木什和羅復  
自請從戶部侍郎阿里衮軍剿賊

詔賜貝勒品級廩給視參贊大臣額敏和卓從阿  
里衮由阿思罕布拉克和什特勒克路擒嗎哈沁  
二百餘於塔木順和爾納木噶復馳赴呼魯木什

和羅將抵肯色嶺謀賊誘戕我都統滿福遁哈喇  
和落尾擊之賊絕嶺遁走庫車阿里衮屯庫爾勒  
額敏和卓屯哈喇和落遣使檄索之不達二十三  
年春

詔授叅贊大臣侯歸從靖逆將軍雅爾哈善剿布拉呢敦  
霍集占復

諭雅爾哈善資額敏和卓謀勿岐視且令酌以回兵從  
如數減綠旗兵額易給糧騎時額敏和卓將進兵



庫車

申命歸吐魯番偕雅爾哈善定議額敏和卓偵沙拉斯  
等賊由庫車遁葉爾羌復自哈喇和落旋兵呼爾  
塔克路剿嗎哈沁馬疲乃返

諭視貝勒秩設長史護衛司儀等員額敏和卓偵霍集  
斯仍居烏什告雅爾哈善曰霍集斯勢埒兩和卓若  
遣使往間或成功速雅爾哈善以

聞不署額敏和卓名

諭曰招撫伯克霍集斯等頗合機宜但額敏和卓既為  
參贊大臣即應列名同奏勿存分別之見夏四月  
詔授多羅貝勒仍兼參贊大臣

諭曰進取回部自可立奏膚功但擒獲逆酋後仍令選  
本處伯克令其辦事伊等俱係新附恐一時難知賢  
否且伊犁駐兵屯田關係甚重亦宜預為籌畫從前  
伊犁地畝皆回人耕種今俟回城平定即將回人酌  
量遷移與綠旗兵錯處額敏和卓係回部望族應同

將軍大臣等管束屯田兵丁俟耕作嫻習主客相安  
再回吐魯番方為有益至一切進勦機宜額敏和卓  
頗屬實心効力嗣後益加奮勉策勲懋賞朕將疊沛  
殊恩五月抵庫車雅爾哈善兵驟進賊自堪施礮額  
敏和卓傷右額退誓曰我受

聖恩厚必舍身力戰奏至

頒賜

御用佩飾銀千兩

諭曰朕因額敏和卓老成諳練故命其參贊軍機并非  
欲伊身在行間親當矢石也今聞奮勇得傷深為軫  
念嗣後惟盡心協力相機辦理不可冒險攻戰致有  
疎虞復

飭責雅爾哈善曰豈有同為大臣而聽其舍身攻戰不  
行勸阻之理額敏和卓嶺瘞射降書入庫車城賊不  
應逆黨阿卜都克勒木自阿克蘇以援至敗之

獎賜

御用佩飾霍集占尋攜賊五千餘援庫車復大敗之獲  
燾二額敏和卓識為霍集占燾雅爾哈善不設備  
霍集占已入庫車復聽逸沙雅爾舊伯克嗎哈默  
第遣子阿三和卓乞降告霍集占自庫車遁乃錄  
狀

聞先是議以額敏和卓從定邊將軍兆惠赴沙拉伯勒  
剿厄魯特逸賊次及回逆

諭曰額敏和卓熟悉回部情形人亦果毅兆惠務宜優

待以收其益尋議分道進兵額敏和卓奏自沙拉伯  
勒取道巴達勒達喀什噶爾取道穆素爾嶺達阿  
克蘇然徑皆險別有間道臣遣使赴兆惠軍為導  
詔兆惠俟剿厄魯特靖移師赴回部或不及可詢額敏  
和卓使屯要隘防霍集占等竄至是

飭責雅爾哈善縱賊罪以兆惠代將其軍復

諭曰額敏和卓係回人雖與雅爾哈善不同亦不得謂  
無過念其素能出力姑從寬貸用觀後效即在兆惠

隊內行走秋軍校瑚圖禮俘賊黨阿里至

詢悉雅爾哈善不善用羣策罪

旨慰額敏和卓

賜三眼孔雀翎尋克庫車進兵阿克蘇兆惠至從赴烏

什招霍集斯降

獎賜佩飾冬抵葉爾羌逆賊抗大軍於喀喇烏蘇額敏

和卓等固拒之

賜郡王品級紅寶石頂四圍龍服霍集占乞和軍門額

敏和卓偕兆惠議斥小醜安敢以和為辭

上聞而嘉之

詔賜

御用佩飾蓋至是凡三錫明年春援兵至破圍還阿克  
蘇其屬有賚資者偵嗎哈沁賊越阿克蘇遁偕索  
倫卒擒之

詔給俘額敏和卓夏進兵喀什噶爾謀布拉呢敦霍集  
占棄城遁以喀什噶爾麥甫熟遣子協理台吉茂



薩馳入城收糧濟軍食

詔賞茂薩公品級大軍抵喀什噶爾兆惠以茂薩理阿  
奇木伯克務遣額敏和卓赴葉爾羌撫其衆

諭曰葉爾羌喀什噶爾二城乃回人根本補授阿奇木  
伯克甚為緊要朕意欲以額敏和卓管葉爾羌以玉  
素卜管喀什噶爾有此等舊人在彼始堪倚任俟大  
功告成後辦理冬十月已達克山函獻霍集占首

諭曰額敏和卓玉素卜俱著勞績此時若同來則回部

經理乏人額敏和卓著加恩晉封郡王駐葉爾羌辦  
事十二月復

諭曰現在大功告成自應令額敏和卓還家但葉爾羌  
等城俱屬新附必得熟悉回部老成歷練之人駐劄  
辦理額敏和卓以舊人効力軍營頗著勞績深悉機  
宜是以暫令留駐但伊數年來久離家室若仍令其  
隻身居外朕心深為軫念可傳諭量攜家口暫行駐  
劄俟諸事就緒即可復回二十五年春

詔圖形

紫光閣

御製贊曰吐魯番族早年歸正命贊軍務以識回性知  
無不言言無不宜其心匪石不可轉移夏四月吏部

侍郎副都統海明遵

旨赴葉爾羌辦事

諭曰海明係內地大臣奏事列名應在額敏和卓前但  
不可以名居前列即輕視額敏和卓額敏和卓老成

諳練辦理一切事宜當與和衷商酌時議設伊犁阿  
奇木伯克轄屯田回民

詔以茂薩任之會喀什噶爾逆回邁喇木呢雅斯等叛掠  
克勒塔里木諸汛茂薩從參贊大臣阿里衮剿賊  
派蘇巴特偵由薩林都遁和羅木魯克尾之賊方  
炊以兵掩擒

詔封茂薩輔國公兼叙額敏和卓功冬葉爾羌伯克鄂  
對喀什噶爾伯克噶岱默特和闐伯克阿什默特

等訐額敏和卓縱通事等虐回衆參贊大臣舒赫  
德察其誣飭責之鄂對等謝罪奏至

諭曰回人積習相沿彼此猜嫌讒毀惟在駐劄大臣持  
平守正嚴加約束著舒赫德曉示葉爾羌喀什噶爾  
回衆云大皇帝用人不過因材器使即如茂薩先因  
喀什噶爾需員辦事故加委任今伊犁駐兵屯田又  
將伊補授阿奇木并非常在喀什噶爾爾等何得造  
言誣謗至通事等皆哈密吐魯番之人若盡行裁革

轉至無所見聞且此番許告呈詞實屬姦狡之徒所  
構嗣後通事等若敢於苛累回人亦即從重辦理以  
示懲創二十六年冬

詔額敏和卓歸吐魯番俟年班伯克入

覲偕至二十七年葉爾羌辦事都統新柱偕額敏和卓  
奏葉爾羌和闐積穀多請令以其二折交騰格採  
買牲畜以其八折交納布運伊犁市哈薩克馬

諭曰折交錢布所及者廣最宜留心查辦即如鄂對阿

什默特二人鄂對尚可信無取巧之事然此特因額敏和卓在彼有所顧忌耳今以玉素卜往代雖同屬舊時臣僕而資望少減恐鄂對不無玩忽額敏和卓於鄂對宜從容開導云爾當勿改初心我暫歸一二年再來駐劄仍可相見如故庶伊知所謹凜將來與玉素卜交代時亦宜告知俾得留心辦理凡遇回部伯克等俱當詳悉訓誡務期正已率屬以挽頽風尋議遣使巴達克山

詔額敏和卓暫留葉爾羌先是巴達克山伯克素勒坦  
沙戡布拉呢敦不謹視尸為逆屬所竊瘞我使索  
不獲至是額敏和卓偵布拉呢敦尸瘞派蘇巴特  
逆子和卓阿斯瑪阿卜都哈里克和卓巴哈敦等  
匿巴達克山將遣使索會素勒坦沙以兵襲博羅  
爾奪齊特喇爾地遣弟沙卜多爾噶達爾據之博  
羅爾長沙瑚沙默特以告額敏和卓書示逆順義  
遣葉爾羌噶雜納齊伯克薩里赴巴達克山責侵



鄰罪令獻布拉呢敦尸及其孥新柱奏巴達克山  
若違辭臣率兵往討留額敏和卓辦事

諭曰巴達克山如斥責不從自當進剿但新柱向未歷  
練戎行額敏和卓頗悉回部情事自當同往會喀什  
噶爾辦事尚書永貴等疏勸回人賦役不肯列額  
敏和卓及玉素卜名

訓責之二十八年春永貴新柱疏調補諸城伯克復不  
列額敏和卓等名

諭曰前次或謂所辦係加恩回衆之事伊等不欲市德  
署名至補授伯克自應同伊等商辦復有何嫌疑不  
行開列額敏和卓等俱久隸臣僕用至參贊大臣伊  
等如意欲辭避亦宜曉示令其勿存形跡已而素勒  
坦沙獻布拉呢敦尸及其子三覆書額敏和卓尊  
稱之曰父詭言齊特喇爾為已舊邑不以給博羅  
爾額敏和卓復遣薩里往責罪疏至

嘉協宜以

御用佩飾

賜之

諭仍留葉爾羌俟事竣歸薩里抵巴達克山素勒坦沙

悔罪歸所掠撤其弟自齊特喇爾旋

獎齊額敏和卓時副都統額爾景額代新柱抵葉爾羌  
上慮不更事

詔額敏和卓仍留處三月二十九年素勒坦沙聞額敏  
和卓歸遣使和濟克蘭齎書至稱葉爾羌大臣等

前聽沙瑚沙默特偏辭齊特喇爾邑請仍察歸額  
爾景額疏

聞

敕責素勒坦沙曰爾詭詞具奏豈以葉爾羌大臣新經  
更替謂可欺飾耶前駐大臣吐魯番郡王額敏和卓  
日後仍來更替爾斯時又將何以為詞爾從前稱額  
敏和卓為父乃伊甫回游牧即詆其偏聽人言亦太  
反覆矣爾其循理守分勿萌僥倖無厭之心始可永

承恩澤復

詔錄額爾景額疏素勒坦沙書寄示額敏和卓令以已  
意達之素勒坦沙尋遣鄂斯敏伯克至奏嗣鈴部  
衆不敢稍存異志復覆書額敏和卓諉罪和濟克  
蘭稱以妄造語言故已懲之

詔錄示額敏和卓尋入

覲

命乾清門行走每

晝接輒

詢諸回部情習三十年春

遣歸甫就道聞烏什衆叛戕副都統素誠奏請馳剿時  
伊犁將軍明瑞以兵往謀烏什賊乞援霍罕

諭曰明瑞兵若尚須協助額敏和卓即暫駐烏什軍前  
喀什噶爾與霍罕額爾德尼部落相近亦開紫要烏  
什事竣仍任參贊大臣駐劄喀什噶爾辦事復以烏  
什之叛由伯克阿卜都拉虐衆故

諭曰阿卜都拉所屬人等任意擾害回人素誠全未查辦額敏和卓與玉素卜俱隸臣僕自不致縱容所屬擾害回人然所屬愚人不知事體輕重希圖小利倚勢橫行著傳諭駐劄大臣等烏什既有此等情事可為警戒將來必須留心體察約束下人斷不可失於防範以致貽伊戚有庫爾勒哈資伯克鄂瑞者以阿奇木伯克色提克責違役故憾之飲其兄噶離納齊伯克和碩爾及族子弟等言曰我將殺阿奇

木筏烏什和碩爾叱之率子三人急起走或以告  
色提克曰阿瑞和碩爾叛矣時喀喇沙爾辦事副  
都統明普赴烏什色提克檄兵歸告庫爾勒將不  
靖

詔額敏和卓便道察順逆狀復

諭明普聽額敏和卓議勿執已見額敏和卓抵庫爾勒  
訊得鄂瑞情以和碩爾不附逆將疏請免死明普  
執不可議誅鄂瑞族疏至



詔和碩爾等免坐尋

聞明普匿額敏和卓議

飭責謬戾罪額敏和卓抵烏什長子素賚瑞從次子茂

薩亦從明瑞至額敏和卓督偕官軍擊賊績屢著

上以素賚瑞茂薩善遵父訓

詔給幣復

獎賜額敏和卓佩飾尋烏什城下額敏和卓赴喀什噶

爾三十二年還入

覲

命御前行走四十二年卒子七長素賚璫襲郡王以罪  
削次茂薩封輔國公以非世爵不立傳次鄂羅木  
咱卜授一等台吉別有傳次色普拉授協理二等  
台吉次伊斯堪達爾繼襲郡王次丕爾敦授二等  
台吉別有傳次拜拉木授二等台吉

一次襲素賚璫額敏和卓長子乾隆十七年授三  
等伯克二十一年

詔封公品級二十三年夏大兵圍庫車有嗎哈沁賊自  
庫爾勒路掠解軍鉛藥

上以庫爾勒距吐魯番近

詔素賚瑞攜兵往清臺路冬以察哈爾總管敏珠爾代  
詔素賚瑞歸復

諭辦理屯田侍郎永貴酌給所部牧畜俾得專力耕作  
二十四年春素賚瑞偕第協理伯克茂薩獻馬百  
助軍

上念所部甫徙牲畜或不給

詔歸之仍傳

旨獎急公二十四年議徙多倫回衆於喀喇沙爾素賚  
瑞赴布古爾庫爾勒度引水溉田分地定居諸務  
獎賜銀幣二十五年入

覲

命乾清門行走二十七年授一等台吉二十九年率子  
莫努啓雅爾護屯田回民赴伊犁三十年從大軍

剿烏什叛賊

諭嘉之四十二年襲扎薩克多羅郡王四十四年以虐所部衆且私宮其屬論罪削郡王爵

召赴京授一等侍衛四十五年素賚瑞卒

詔歸葬吐魯番

二次襲伊斯堪達爾額敏和卓第五子乾隆三十一年從其兄鄂囉木咱卜赴伊犁協理屯田務三十八年叙功授五品秩

賞孔雀翎四十一年入

覲四十二年

命乾清門行走四十四年襲扎薩克多羅郡王四十八年

詔世襲罔替五十三年正月奉

上諭吐魯番郡王伊斯堪達爾前入覲時朕觀其材具尚堪造就今散秩大臣鄂斯瑞病故所遺喀什噶爾三品阿奇木伯克之缺即著伊斯堪達爾補授前往

喀什噶爾隨同明亮伯興辦理事務伊斯堪達爾之  
兄色普拉弟丕爾敦等俱現在吐魯番著色普拉辦  
理游牧事務吐魯番大臣更當善為照料伊斯堪達  
爾著賞銀一百兩以為遷徙家口之需即於吐魯番  
官銀內撥給伊斯堪達爾雖係郡王且在乾清門行  
走但初赴喀什噶爾阿奇木伯克任明亮伯興諸事  
須常指示令照鄂斯璫任內事宜辦理

附  
一等台吉鄂囉木咱卜列傳

鄂囉木咱卜吐魯番扎薩克郡王額敏和卓第三子乾隆二十六年喀什噶爾辦事左都御史永貴疏鄂囉木咱卜善理所部

諭曰額敏和卓數年辦事軍前伊長子素賡瑞次子茂薩俱承辦公事吐魯番等處事務係伊第三子鄂囉木咱卜管理著加恩賞戴二品頂帶孔雀翎以示鼓勵三十一

年  
詔授一等台吉任伊犁三品阿奇木伯克四十八年



詔俟出缺後視有績今子如爵無績以次降襲三等台  
吉五十三年

詔世襲一等台吉罔替

附二等台吉丕爾敦列傳

丕爾敦吐魯番扎薩克郡王額敏和卓第六子乾  
隆三十六年入

覲

詔授二等台吉

賜孔雀翎

命乾清門行走四十八年

詔俟出缺後視有績令予如爵無績以次降襲四等台

吉五十三年

詔世襲二等台吉罔替

欽定外藩蒙古回部王公表傳卷之一百十

欽定四庫全書

欽定外藩蒙古回部王公表傳卷之一百十一

傳第九十五

厄魯特和碩親王達瓦齊列傳

居京師之厄魯特今襲固山貝子

達瓦齊厄魯特人姓綽囉斯系出準噶爾巴圖爾  
琿台吉有布木者號額爾德尼台吉子策凌敦多  
卜以族台吉同名別稱大策凌敦多卜子五長納  
木扎爾達什次多爾濟丹巴次巴哩次達什車稜

次班珠爾納木扎爾達什子即達瓦齊康熙十六年布木附噶爾丹表貢駝馬嗣噶爾丹不靖

上三駕親征之平其部布木偕策妄阿喇布坦表乞命

上以不助噶爾丹逆宥之布木死大策凌敦多卜倚策妄

阿喇布坦為奸兵襲唐古特大軍敗之遁歸雍正

九年噶爾丹策凌遣襲我北路阿爾台軍十年納

木扎爾達什侵哈密大軍復敗之乾隆十八年杜

爾伯特三車凌來歸以達瓦齊襲準噶爾台吉告

蓋自噶爾丹策凌死策妄多爾濟納木扎勒嗣其  
庶兄喇嘛達爾扎篡之召達瓦齊往謁達瓦齊游  
牧額密爾領準噶爾二十一昂吉之一懼喇嘛達  
爾扎誅走和通呼爾哈將携衆五千來降定邊左  
副將軍喀爾喀親王成衮扎布以

聞

諭曰達瓦齊乃大策凌敦多卜孫前與準噶爾定界時  
無不納降人約且自噶爾丹亂後收養準噶爾人甚

衆若達瓦齊至而不納是絕其歸路矣達瓦齊果力窮來歸可量給糧騎馳送京師既而達瓦齊走哈薩克喇嘛達爾扎索之竄歸偕阿睦爾撒納謀弑喇嘛達爾扎襲其位杜爾伯特諸台吉因亂叩闕內附十九年達瓦齊遣使奉表

詔遂歸阿睦爾撒納以綽羅斯氏自相殘凱為琿台吉而非其族懼厄魯特不從陰助達瓦齊逆俟厄魯特叛將計取達瓦齊察阿睦爾撒納異志兵擊之

阿睦爾撒納覲乃為內面計偕和碩特台吉班珠爾等間道來降

上以達瓦齊虐所部降者至輒告準噶爾如水火狀衛拉特諸台吉挈數萬衆屯內汎非安撫之不可將極準噶爾亂俟伊犁定議設四衛拉特如舊

諭曰準噶爾本元之臣僕竄處西北恃其荒遠憑陵番部我

皇祖聖祖仁皇帝三次



親征肅清沙漠

皇考世宗憲皇帝時策妄阿喇布坦父子濟惡仍肆跳梁  
是以

命將出師聲罪征討朕嗣統當

皇考降旨撤兵之後而噶爾丹策凌遵守定界遣使請安  
求通貿易朕特加恩俯允以示懷柔迨噶爾丹策凌  
物故其子策妄多爾濟納木扎勒為孽兄喇嘛達爾  
扎所殺而喇嘛達爾扎復為達瓦齊所弑在喇嘛達

爾扎雖承緒不正尚屬噶爾丹策凌之子至達瓦齊則篡竊亂臣耳乃今年夏間遣使來京仍請赴藏熬茶覲然以噶爾丹策凌自處試思堂堂大清中外一統而夷部亂臣妄思視同與國此其逆天悖理為何如耶上年杜爾伯特台吉車凌等率衆來降今秋輝特台吉阿睦爾撒納等又舉部內附斯均窮蹙來歸之人朕為天下共主兼覆并載既無拒而不納之理而喀爾喀內地俾此輩數萬衆仰食聚處將來滋生

蕃庶亦豈久安善策朕於達瓦齊初無興師問罪之意而時會所至揆之理勢實有不得不從長經理者特將此蕃用兵始末宣示中外知之二十年

詔大軍往討分西北兩路

諭曰達瓦齊雖有罪究屬一部台吉倘伊屬人見事勢窮蹙將伊擒獻毋加戕害候朕諭旨遵行定邊右副將軍薩拉爾道遇達瓦齊使入貢請罪叱之曰我奉天子命往討達瓦齊他非所知以表達

京師羈達瓦齊使遣侍衛塔齊圖等齎檄往招達瓦齊竄格登大軍逾伊犁追之視達瓦齊營負格登崖臨淖議曰大軍經萬餘里未嘗血刃遺鏃今達瓦齊懼誅為負隅計撻伐之將玉石俱焚毋乃非聖天子救絕域意不如誘擒之善以喀喇巴圖魯阿玉什巴圖濟爾噶爾察哈什三人領健卒二十二宵策馬入達瓦齊營招降台吉宰桑等四十九人及厄魯特兵五千餘達瓦齊逸叅贊大臣達爾黨阿

等躡擊之收達瓦齊叔父班珠爾及從者六十餘  
達瓦齊踰庫爾克嶺定北將軍班第遣使分道索  
烏什阿奇木伯克霍集斯偵達瓦齊赴喀什噶爾  
以兵伏林遣弟携酒及馬紿迎達瓦齊至伏驟起  
達瓦齊及子羅卜扎宰桑阿爾齊丹津達爾巴蓋  
烏巴什敦多克摩羅木色克色德克吹索諾木額  
木齊圖巴等七十餘人悉就縛霍集斯馳告班第  
遣兵五百迎諸穆素爾械赴

京師準噶爾平是役也

上獨申睿斷於天時人事

智深勇決洞悉先機師行萬里兵不血刃

大功迅奏

廟算無遺具纂

平定準噶爾方畧中

上御製準噶爾全部紀畧於其世次事蹟特詳十月俘

達瓦齊至

告祭

太廟

社稷行獻俘禮

上御午門樓受之

詔宥罪

賜冠服白銀時阿睦爾撒納叛綽羅斯降台吉噶爾藏

多爾濟封綽羅斯汗遵

旨赴定西將軍策楞營達瓦齊奏臣俘囚蒙

聖主不加誅

賜厚恩捐糜頂踵不足報阿睦爾撒納背恩竄臣夙讐  
恨不奮擒杜爾伯特台吉伯什阿噶什庫本諾音  
台吉諾爾布等臣知不與賊黨請遺書令協擒庶  
彰國法快人心

諭曰前因準噶爾夷部數年以來篡奪頻仍所屬諸部  
率衆向嚮接踵而至朕為天下共主既不忍拒而不  
納將為之經理游牧即因其地處之為久長計而



兩朝未竟之緒亦乘此事機一勞永逸此用兵之本意也  
至達瓦齊之立為台吉不過外夷自相篡竊原可不  
必聲罪致討從前所降諭旨甚明但以達瓦齊進貢  
請安尚居然以噶爾丹策凌自處是以降敕切責旋  
復遣使叩關情詞恭順則大軍已入其境未得至京  
將軍等取其書奏之及王師進取伊犁伊畏避逃竄  
亦情理所有是達瓦齊原無獲罪於天朝之處伊之  
殘酷暴虐亦皆出於阿睦爾撒納之口迨俘獲來京

視之則一庸慙可憫之人耳且言久思歸順特以阿睦爾撒納領兵前往實不便於其軍前納款此其肝膈本懷非由飾說古者異國降王或優以封爵示無外也達瓦齊著加恩封為親王賜第京師奉朝請朕撫馭萬國一秉大公仁育義正惟聽人之自取可將此宣示達瓦齊并曉諭中外知之復

諭曰朕已將達瓦齊宥罪施恩封為親王帶領伊子居住京師伊舊日屬人著查出四五十戶令來京役使

并著策楞曉諭噶爾藏多爾濟等及準噶爾人衆從  
前進兵擒勒達瓦齊止因阿睦爾撒納愬其暴戾無  
狀凌虐準夷朕軫念羣生拯救水火是以聲罪致討  
今拏解來京乃一庸愚無用之人即伊種種虐行其  
初亦皆係阿睦爾撒納從中相助非伊一人之罪且  
達瓦齊原係綽羅斯台吉朕憐憫其愚備藩京邸斷  
不令回至游牧現在達瓦齊感戴朕恩思圖報効繕  
寫書信寄伊親信之杜爾伯特台吉伯什阿噶什庫

本諾音台吉諾爾布等令其協擒阿逆以彰國法具  
見誠悃著策楞即行轉交仍將伊等接到達瓦齊書  
後言語情形速行奏聞後伯什阿噶什諾爾布皆降  
噶爾藏多爾濟叛從子扎納噶爾布戕之復為扈  
魯瑪台吉達瓦所殺阿睦爾撒納走死俄羅斯準  
噶爾亂永定二十一年尚郡主授多羅額駙二十  
四年卒

諭曰厄魯特親王達瓦齊曾為準噶爾台吉被獲獻俘

朕念伊係外藩宥罪錫爵伊自受恩以來隨侍禁近  
一意抒忱奮勉且為人尚屬樸誠今聞溘逝深為軫  
惻著給治喪銀十兩伊子羅卜扎仍准其襲封郡王  
一次襲羅卜扎達瓦齊長子乾隆二十一年授公  
品級

命乾清門行走二十四年襲多羅郡王二十七年尚郡  
君授固山額駙三十九年大學士舒赫德劾其私  
交外吏貪鄙牟利

詔削郡王爵禁之弟富塔喜降襲多羅貝勒

二次襲富塔喜達瓦齊次子乾隆三十九年襲多

羅貝勒

命乾清門行走四十六年因耽逸不勤職

詔削貝勒爵以羅卜扎子富爾納降襲固山貝子

復

諭富塔喜偕羅卜扎居家悔罪嗣此若復別滋事端當

重治罪

三次襲富爾納羅卜扎長子乾隆四十六年襲  
固山貝子四十八年理藩院議俟出缺時降等襲  
爵

諭曰富爾納之祖達瓦齊原係準噶爾大台吉平定準  
噶爾時將伊擒獲朕乃加恩封為親王迨伊身故其  
長子羅卜扎降等承襲郡王乃并不安分守法以故  
議罪革職達瓦齊次子富塔喜降等承襲貝勒又復  
懶惰猥鄙續行革職以羅卜扎子富爾納降等承

襲貝子出缺後自應依議降等但念達瓦齊乃承襲  
準噶爾大台吉之人若令由貝子遞降世爵朕心實  
為不忍著加恩將富爾納現襲貝子爵俾予世襲  
罔替



欽定外藩蒙古回部王公表傳卷之一百十一

欽定四庫全書

欽定外藩蒙古回部王公表傳卷之一百十二

傳第九十六

土默特輔國公喇嘛扎布列傳

居歸化城  
之土默特

喇嘛扎布土默特人姓博爾濟吉特元太祖十六  
世孫阿爾坦裔阿爾坦號格根汗初由河套徙豐  
州灘築城架屋居之曰拜姓即明時訛為板升者  
也明以其通好封順義王以歸化名所居城至今

仍之阿爾坦子九長僧格號杜稜汗子噶爾圖以  
避察哈爾東徙隣喀喇沁為土默特東路即今駐  
牧巴顏和碩之土默特右翼扎薩克其居西路者  
自格根汗凡四傳至博碩克圖汗仍居歸化城察  
哈爾強役屬博碩克圖汗不從偕喀喇沁部布顏  
台吉等敗察喀爾兵四萬於土默特之趙城又敗  
其赴張家口請明賞兵三千與察哈爾林丹汗交  
惡博碩克圖汗卒林丹汗襲之有其衆

本朝天聰六年大軍征察哈爾以林丹汗西奔唐古  
特移師趨歸化城博碩克圖汗子俄木布及其部  
頭目古祿格杭高託博克等集衆降

詔安堵如故九年以林丹汗竄死大草灘

遣使取道歸化城往諭唐古特

命所部人護送之九年睿親王多爾袞率師收林丹汗子  
額哲於黃河西託里圖地貝勒岳託留駐歸化城  
所部人告變言俄木布乳母之夫毛罕潛通明沙

河堡守將以歸化城叛偽稱俄木布為西土格根  
汗且導明使約喀爾喀兵為外應岳託遣謀往喀  
爾喀兵在途追襲之無脫者毛罕伏誅執俄木布  
以歸

諭古祿格杭高託博克分守歸化城轄土默特部衆崇德  
元年

詔編所屬三千三百餘丁為二旗以古祿格為左翼都統  
杭高為右翼都統領之託博克尋代杭高子巴桑

掌右翼嗣是博碩克圖汗裔分隸左右翼稱台吉  
喇嘛扎布祖素爾巴勒濟圖父達木巴世居歸化  
城隸左翼乾隆二十年

詔徵歸化城土默特兵千隨北路大軍勦達瓦齊於伊  
犁喇嘛扎布獻馬三百助敘功授一等台吉

命乾清門行走二十一年奉

命隨承恩公明瑞赴巴里坤徙厄魯特達什達瓦部衆  
於阿爾台並以其女妻和託輝特郡王青衮咱卜

會青衮咱卜叛

詔隨左副將軍喀爾喀親王成衮扎布由烏里雅蘇台  
進勦偵青衮咱卜欲遁俄羅斯復隨叅贊大臣納  
穆扎爾等輕騎尾之抵抗哈將噶斯青衮咱卜就  
擒捷

聞

詔增設土默特一旗封喇嘛扎布為輔國公授扎薩克  
隸烏蘭察布盟

敕曰朕仰荷天庥撫綏區宇中外臣工凡有効力宣猷  
勞績茂著者罔弗優封爵秩用獎忠勤爾土默特一  
等台吉喇嘛扎布追擒叛逃奮勇有功朕甚嘉之爾  
其副朕恭養之隆恩歸撫爾旗人衆恪守典常靖共  
爾職勿蹈愆尤敗乃成業國有常刑勗哉毋斁二十  
五年以不入

覲及違例妄行罪議削爵

諭曰喇嘛扎布自優封公爵以來不思感激朕恩奉公



守法乃曰耽逸樂恣意妄為本應照議削爵但念公爵究係從前勤勞所得著加恩免削其扎薩克及乾清門行走之處一併革退飭令回旗効力三十一年

卒子索諾木旺扎勒襲

一次襲索諾木旺扎勒喇嘛扎布次子乾隆三十一年襲輔國公四十九年

詔世襲固替

原授土默特左翼都統古祿格列傳

居歸化城之土默特今改

襲三等子

兼三等男

古祿格土默特人姓納喇其先本姓土默特因滅  
扈倫國之納喇部遂以為姓世居葉赫部古祿格  
以葉赫部亡往依土默特部博碩克圖汗於歸化  
城號楚琥爾嗣博碩克圖汗卒察哈爾林丹汗攻  
滅土默特役屬之天聰六年大軍征察哈爾古祿  
格偵林丹汗由歸化城西遁懼掠匿山砦乃免旋  
請內附九年來朝

優賚之崇德元年授左翼都統與右翼都統杭高並駐守  
歸化城三年春以喀爾喀扎薩克圖汗擁衆逼歸  
化城馳疏

聞

上統大軍征之扎薩克圖汗遁師旋

諭古祿格及右翼都統杭高曰爾等所守城小壕狹勢難  
禦敵宜於城外建築層垣以資捍衛垣如城然高一丈  
五尺濶稱之俾可屯兵其上垣四面置四門門各置甕

城四隅各建望樓垣外環以深壕工竣之日內城外垣嚴加防守敵自不敢窺伺爾等其善為之夏率叅領韜

瑚等九十六人來朝

遣官迎宴

詔授一等男爵

賜弓矢冠服冬遣烏巴什等貢朝珠文綺四年獻所獲明歲給幣五年授其子烏克蘇穆佐領職俾協守歸化城六年正月古祿格遣弟巴圖等貢駝馬三月

復遣使納穆習禮等解送來降蒙古

獎賜白金有差順治元年遣使獻方物

賜雕鞍弓矢皮幣二年

獎宣力久勤勞懋著晉爵三等子

特頒珠頂貂帽朝衣玉帶甲冑弓矢等物以殊異之六年

睿親王多爾袞征喀爾喀古祿格以兵來會偵喀

爾喀遁乃歸康熙五年卒長子烏巴什泰襲三等

子

召赴京隸蒙古正白旗第子子錫喇布留歸化城襲都統  
一次襲錫喇布古祿格第四子康熙五年由佐領  
襲都統九年卒子古睦德襲

二次襲古睦德錫喇布長子康熙九年由佐領襲  
都統二十二年内大臣奇塔特等奉使厄魯特察  
獲所掠歸化城人巴朗歸之古睦德二十五年古  
睦德來朝以厄魯特巴圖爾額爾克濟農和囉理  
攜衆降將由歸化城入

覲

命速歸護降衆未幾以廢職罷都統

召赴京授佐領隸蒙古正白旗其叔父阿喇納襲都統

三次襲阿喇納古祿格第五子康熙二十五年由

佐領襲都統二十七年偕副都統阿迪等選兵偵

禦噶爾丹三十年

命護視附近歸化城游牧之喀爾喀衆毋致失所三十五

年偕阿迪等隨大將軍費揚古擊噶爾丹於昭莫

多師旋運礮七十九貯歸化城三十六年正月助  
軍駝三月

駕由歸化城視師寧夏以土默特士衆委靡弓馬不嫻由  
左翼都統阿喇納及右翼都統阿弼達等軍律廢  
弛所致

詔削職右翼都統停世襲改用京員左翼都統以阿喇納  
兄子原襲都統古睦德自京往代

四次襲古睦德康熙三十六年復襲都統四十三



年卒子丹津襲

五次襲丹津古睦德長子初授侍衛兼在京佐領  
職康熙四十三年赴歸化城襲都統先是烏巴什  
泰襲三等子卒阿玉什襲阿玉什卒子多爾濟襲  
五十九年多爾濟以罪革三等子

命丹津兼襲雍正元年疏請建

至聖先師廟于歸化城左右翼各設滿學教官一歸化  
城增理事同知一

允之復以訓所部弁兵嫻弓馬

諭右翼都統如世襲舊制以阿弼達子根敦補授其副都統職聽丹津察舉詳阿弼達傳九年大軍議勦噶爾丹

策凌

命丹津與副都統五十六酌辦歸化城駐兵事宜尋因移

駐洪果爾鄂隆

詔察給兵騎十二年以烏喇特部被災損牧畜遵

旨察閱戶口發歸化城帑賑之十三年九月奏歸化城每

年解額爾德尼昭糧米四萬八百石向用內扎薩克等牛車及喀爾喀官駝請自來年始募商駝輓運停喀爾喀官駝令善牧備軍用又應用米向由山西巡撫撥解道紆不無竭蹶請以商人所納倉米十萬石就近解送庶經費省動用亦便

上從其請十二月

命大臣赴歸化城視形勝地築城屯田以丹津及根敦協理之乾隆元年設馬廠于歸化城北

詔丹津董牧務二年卒先是丹津子達索居京由世襲  
佐領厯官散秩大臣卒無子以丹津族子扎什泰  
襲佐領至是丹津妻請即以扎什泰為丹津嗣  
詔停襲左翼都統職仍襲三等子


六次襲扎什泰丹津嗣子乾隆二年襲三等子兼  
授三等侍衛二十四年

諭曰左翼古祿格所遺都統職前因丹津無嗣停襲著  
加恩照右翼例改授三等男爵令三等子扎什泰兼

襲三十年卒子福保襲

七次襲福保扎什泰次子乾隆三十年襲三等子

兼三等男



欽定外藩蒙古回部王公表傳卷之一百十二